

## Éxitu de la recuperación del robecu en L'Aramu en La última (22) La Voz de Lena

Xurde Fernández

El robecu cantábricu ta en peligru de desapaición n'El Aramu; por eso la Consejería de Mediu Ambiente del Principáu d'Asturies ta trabayando reintroduciendo nesta zona animales que traen del conceyu de Somiedu. El robecu cantábricu ye una de les subespecies más pequeñes d'esti animal. La capa nun ye d'un color uniforme, cambia dependiendo de les estaciones del añu: n'iviernu ye d'un color tirando a pardo con zones más o menos escures o negres. En branu'l pelo ye d'un color tirando a roxo pardo.

El cuerpu ye robustu, les pates son llargues, más llargues les posteriores que les anteriores. Les pezuñes son fuertes, cola suela elástica y el borde duru y delgáu, lo que fai que puea desplazase con facilidá sobre peñes y suelu difícil y emplunu. Na cabeza tien dos bandes negres llaterales que s'esparden dende'l focicu hasta les oreyes, el restu de la cabeza ye d'un color más blanco. Tanto los machos como les femes tienen cuernos siendo los de les femes más pequeños. Los cuernos de los machos medren verticalmente p'arriba y curvaos nes puntes formando un ganchu; la cuerna ye perenne y medra tolos años de la vida del animal. Viven en rebaños, dacuando mui numerosos. Los machos adultos suelen ser solitarios.

Na dómina de celu fáense los combates ente los machos adultos pa poder formar un "harén". Ye nesta dómina cuando los machos fáense territoriales marcando les zones cola secreción del muérganu glandular allugáu na base de los cuernos. Aliméntense de yerba, fueyes, musgu y frutos del monte. Les femes paren una o dos críes ente abril y xunu depués d'unos seis meses de xestación.

La Consejería de Mediu Ambiente va siguir apostando pola suelta de robecos na contorna de L'Aramu nes próximes feches. Hasta'l mes de febreru de 2011 reintroduxéronse con éxitu cincuenta y ún exemplares que proveníen de la reserva de caza del conceyu de Somiedu, un llugar onde la población ye abundante y n'expansión.

Con estes actuaciones quier recuperase la población de robecos na Montaña Central d'Asturies y, al mesmu tiempu, revitalizar económicamente la zona orientándola al turismu y a la caza. Asina, el nome d'esti plan impulsáu pola Consejería de Mediu Ambiente, Ordenación del Territoriu y Infraestructures ye "Proyeutu de recuperación de les poblaciones de robecu na Sierra l'Aramo: La caza como recursu turísticu na Montaña Central d'Asturies". La idea principal ye, según la consejería, "afitar una población d'esta especie na zona, de manera que les poblaciones de robecos puedan recolonizar los principales macizos montañosos allugaos nos conceyos de Riosa, Morcín, L.lena, Proaza y Quirós".

La recuperación del robecu cantábricu, una subespecie única a nivel mundial, "sedrá un exemplu d'interacción positiva ente los ganaderos, habitantes de los núedos rurales, cazadores y conservacionistes, y podrá xenerar actividaes sostenibles complementaries col desarrollu rural como'l turismu o la caza", n'opinión de la Consejería de Mediu Ambiente. El plan pa reintroducir l'animal na Sierra l'Aramo entamó nel 2007 y, hasta la fecha, permitió la suelta de cincuenta y ún exemplares con éxitu: venti na Peña Caranga (Proaza), doce na vertiente oeste del Aramo (Quirós) y diecinueve na este

por Xurde Fernández Fernández, en La Voz de Lena  
lavozdelena@yahoo.es

(Morcín-Riosa). Asina, al ser puntos cercanos, inténtase que los animales puean interactuar.

Agora, nesta parte segunda del proyeutu de recuperación, l'oxetivu ye lliberar grupos de robecos nes zones onde yá comenzara la reintroducción y garantizar el siguimientu y la vixilancia de los animales yá lliberaos; amás de facer un siguimientu de tolos exemplares lliberaos.

La iniciativa de recuperar el robecu cantábricu cuenta cola participación de persones que son parte de dellos colectivos: el Grupu d'Aición Local de la Montaña Central qu'al traviés del programa LEADER (Consejería de Mediu Rural y Ministeriu de Mediu Ambiente, Rural y Marín) subvenciona'l 81% del costu del proyeutu; Gas Natural y Repsol YPF, que participen como copatrocinadores; Cotos Rexonales de Caza de Riosa-Morcín, Quirós y L.lena y la Sociedá de Cazadores de Morcín, que ye la encargada de xestionar los fondos; la consultora ambiental Biogestión, encargada de coordinar la parte técnica del proyeutu; tamién colabora l'Institutu de Recursos Cinéticos (IREC), el Llaboratoriu de Sanidá Animal del SERIDA, el personal y la guardería del Parque Natural de Somiedu y del Parque Natural de Las Ubiñas-La Mesa y los Conceyos de Proaza, Somiedu, Quirós, Riosa, Morcín y L.lena.

por Xurde Fernández